

Urden da sepultura  
e da santieri  
digl  
Cumegn da  
Tinizong-Rona

## CUNTIGN

	<u>artetgels</u>	<u>pagina</u>
I. ORGANISAZIUN, MENASCHI E SURVIGILAZIUN	1 - 3	2
II. URDEN DA SEPULTURA	4 - 10	3
III. URDEN DA SANTIERI	11 - 21	5
IV. DISPOSIZIUNS FINALAS	22	8

## I. ORGANISAZIUN, MENASCHI E SURVIGILAZIUN

### Art. 1

*Survigilaziun ed execuziun*

La survigilaziun suprema digls fatgs da sepultura e santieri dallas dus fracziuns surstat alla supranza communal. Ella è responsabla per l'execuziun digl urden da sepultura e santieri.

### Art. 2

*Incumbensa*

L'incumbensa dalla supranza communal cumpeggia an spezial:

1. la survigilaziun ed observaziun digl urden da sepultura e santieri
2. la controlla dall'erecziun dallas fossas e reschlas
3. la concessiun da lubientscha per rumager las fossas siva digl silenzi da mort
4. la concessiun da lubientschas per sepulturas da persungas mortas orsoura
5. la nominaziun e survigilaziun digl personal da sarvetsch pigl santieri
6. la controlla digl register dallas fossas
7. la survigilaziun digl tutgiez da mort

### Art. 3

*Survigilaziun ed execuziun*

La survigilaziun suprema digls fatgs da sepultura e santieri dallas dus fracziuns surstat alla supranza communal. Ella è responsabla per l'execuziun digl urden da sepultura e santieri.

## II. URDEN DA SEPULTURA

### Art. 4

*Metter aint  
igl vaschel  
da mort*

Ena bara dastga neir messa aint igl vaschel da mort pir siva dalla constataziun dalla mort tras en medi tgi practitgescha sia professiun.

### Art. 5

*Li da  
sepultura*

Tottas persungas tgi èn mortas aint igl noss cumegn vignan sutaradas ainten egn digls santieris. Chegl vala er per persungas tgi èn neidas cattadas segl noss intschess.

Sen giaveisch digl defunct u digls sies confamigliars, dastga er neir sutaro sen en oter santieri public. An tal cass ègl basigns digl consentimaint dalla suprastanza da chel li.

### Art. 6

*Lubien-  
tscha da  
sepultura*

Persungas sainza domicil aint igl noss cumegn e talas tgi èn betg cattadas mortas segl noss intschess, dastgan neir sutaradas angal cun lubientscha dalla suprastanza.

### Art. 7

*Tutgiez da  
mort*

Igl caloster procura igl tutgiez da mort tenor igl urden suandont:

An terma da 24 ouras siva dall'annunztga da mort vign tutgia treis gedas  $\frac{1}{4}$  d'oura cun ena pòssa da mintgamai 1 minuta. Per omens, antschever e fittar cugl sains grond, per donnas, antschever e fittar

cugl 2. grond sains e per unfants tgi na von betg anc a scola, tutgier angal cugl sains pitschen.

#### Art. 8

*Sepultura* Igl vaschel da mort dastga neir mess an baselgia igl de da sepultura max. 3 ouras avant la funcziun da bara.

#### Art. 9

*Tgavar la fossa* La canzleia communal procura tgi vigna tgavo la fossa.  
Agl santieri da Rona stò neir midada mintgamai la tera. (Scumanzo igl onn 1994).

#### Art. 10

*Taxas da sepultura* La suprastanza communal fixescha las tariffas per las sepulturas.

### III. URDEN DA SANTIERI

#### Art. 11

*Urden  
dallas  
fossas*

La canzleia communal magna en register dall'ocupaziun digls santieris an en register da fossas cun nom, prenom, onn da naschientscha e mortori da tot igls defuncts.

#### Art. 12

*Succes-  
siun dallas  
fossas*

La successiun dallas fossas succeda an roda, tenor igls plans da santieri.

#### Art. 13

*Silenzi da  
mort*

Igl silenzi da mort monta aglmanc 20 onns per defuncts scu er per urnas sutaradas singulas. Tar la revocaziun dallas fossas siva digl silenzi da mort duessan restanzas dad òssa ed urnas neir sutaradas degnamaintg.

#### Art. 14

*Sepultura  
dad urnas  
ainten ena  
fossa  
existenta*

Sen giaveisch digls confamigliars pò neir lubia da metter urnas ainten ena fossa existenta u da metter plessas urnas ainten la madema fossa. Igl taimp da silenzi da mort per la fossa pertutgeida tenor art. 13 na vign betg midada cotras.

## Art. 15

*Fossas d'unfants* Per fossas d'unfants vign zavro or ena zona speziala an santieri.

## Art. 16

*Maseiras dallas fossas* Las fossas e crouschs on d'aveir las suandontas maseiras: (Largezza e lunghezza digl our dalla fossa, profunditad minimala dallas fossas, otezza maximala dallas crouschs)

	largezza	lunghezza	profonditad minimala	otezza dalla crouch
per carschias ed unfants sur 10 onns	60 cm	160 cm	150 cm	130 cm
per unfants sot 10 onns	60 cm	95 cm	120 cm	90 cm
per urnas	60 cm	160 cm	80 cm	130 cm

Las crouschs on da neir messas davains la reschla.

## Art. 17

*Monumaints da fossas* Per monumaint da fossa dastgan neir messas ve crouschs ni craps. Las inscripziuns duessan neir fatgas per regla an rumantsch. Ulteriouras plattas da crap u blocs da crap tgi corvan la fossa n'èn betg lubias. Las crouschs e las reschlas on da neir messas an roda tenor igl plan da santieri ed an convagnientscha cun la canzleia communal, igl pi bod en onn siva dalla sepultura.

## Art. 18

*Revocaziun dallas fossas* An cass da basigns ordinescha la suprastanza communal la revocaziun dallas fossas ed avisescha igls

confamgliars aglmanc en meis avant.

#### Art. 19

*Rumageda* Schi la fossa vign betg rumageda ainfra igl termin fixo, vign la lavour exequeida an incumbensa dalla suprastanza communal ed a chint digls confamgliars. La suprastanza communal dispona da monumaints da fossa tgi n'èn betg nias allontanos sen igl termin fixo.

#### Art. 20

*Mantignamaint* Igls confamgliars èn obliias d'ornar e da mantigneir las fossas. Igl è scumando d'amplantar plantas e tgaglias (cun excepziun da plantas decorativas) sen las fossas. Igl ornamaint dalla fossa na dastga betg surpassar la reschla dalla fossa. Igl plaz anturn la fossa ò da neir zarclo. Igl mantignamaint digl ulteriour santieri è tgossa digl cume gn politic.

Tschapels e flours sblitgeidas scu er igl zarclem è da dustar agl li destino persiva.

#### Art. 21

*Livels da famiglia* Igl cume gn venda nigns livels da famiglia. Tals stos vandias scrodan siva igl taimp stipulo aint igls contracts respectivs.

## IV. DISPOSIZIUNS FINALAS

### Art. 22

*Vigour*

Chel urden da sepultura e santieri vo an vigour cun l'approbaziun tras igl cumegn ed igl departamaint da sanitad cantunal. Cun l'antrada an vigour da chest urden da sepultura e santieri vignan revocos tot igls conclus da cumegn, tgi cunterfon agl urden preschaint.

Chel regulativ è nia approuo dalla radunanza da cumegn igls 14-07-00

Igl mastral:

Igl actuar:

Mario Jegher

Mario Dosch